

De Sicilia.

SICILIA Romanorum horreum, sexcentis ac duo de uinginti passuum milibus ambitu patet, à Possidonio, quem sequitur Diod. Siculus, stadijs quater mille & quadringentis definitur, quondam Brutio agro cohærēs, mox interfuso mari auulsa ad mille & quingentos freti latitudinis passus: in eoq̃ uorticofo freto Scylla & Charibdis, ambo clara sæuitia. Primi eam habitasse feruntur Liberi duce rege Sicano, unde dicta Sicania. Successit Siculus Neptuni filius cum Amplissima Græcorum manu. Trianguli figura tribus promotorijs Peloro Pachino & Lilybeo clauditur.

De Sardinia.

SARDIS Hercule procreatus, cum magna multitudine à Lybia profectus, Sardinia occupauit, & ex suo uocabulo insulæ nomen dedit. Hæc in aphrico mari, facie uestigij humani, tam in Orientem q̃ Occidentem latior prominet, fermè paribus lateribus, quæ in meridiem & septentrionem uergunt. Terra patens in lōgitudine miliaribus 140. In latitudine 40. In ea neq̃ lupus, sed solifuga tantum animal exiguum, hominibus perniciosum. Venenum quoq̃ non nascitur ibi, nisi herba, per scriptores plurimos & poëtas memorata, Apiastro similis, que hominibus risum contrahit, & quasi ridentes interimit. Fontes habet Sardinia calidos, infirmis medelam præbentes, furibus cecitatem, si sacramento dato, oculos aquis eius tetigerint.

De Corsica.

CORSICAE Insulæ exordium Ligures dederunt, appellantes eam ex nomine ducis. Nam mulier quædā Ligur, Corsica nomine, cū taurum ex grege, quem prope littoraregebat, transnatare solitum, atq̃ per interualla, corpore aucto, remeare uideret, cupiens scire incognita sibi pabula, taurum è cæteris digredientem, usq̃ ad insulam, nauigio prosecuta est, cuius regressu, insulæ fertilitatem cognoscentes, ligneis ratibus eò profecti sunt, eaq̃ nomine mulieris autoris & ducis appellauerunt. Hæc Græcæ Cyrene dicitur, à Cyreno Herculis filio inhabitata.